

光緒辛巳年重修

惠州府志

五

惠郡城北文昌宮藏板

惠州府志卷十一

經政

祀典

社稷壇每歲春秋仲月上戊日設主於壇硃漆書曰府社

神府稷神承祭官率各官衣朝衣行二跪六叩禮三獻

同讀祝一叩祭品帛一黑白磁爵三羊一豕一鉶二簋

四豆四簋二簋二神同獻每州縣例支祭品銀十八

兩五錢八分三釐

祝文部頒

惟神莫安九土粒食萬邦分五色以表封圻育三

農而蕃稼穡恭承守土肅展明禋時屆仲春秋敬修祀

典庶九九松柏輦盤石於無疆翼翼黍苗佐神倉於
不匱尙饗

謹按會典社稷壇爲大祀

風雲雷雨山川城隍共一壇每歲春秋仲月致祭安設風

雲雷雨之神居中帛四

府

縣境內山川之神居左帛二

州

城隍之神居右帛一其白色帛七陳設禮儀與社稷壇
同經費在社稷壇經費內勻支

祝文 部頒

維 神贊襄天澤福佑蒼黎佐靈化以流形生成永
賴乘氣機而鼓盪溫肅攸宜磅礴高深長保安貞之
吉憑依鞏固實資捍禦之功幸民俗之殷盈仰神明

之庇護恭修歲祀正值良辰敬潔豆籩祇陳牲帛尙
饗

雩祭每歲孟夏於神祇壇設祀如制經費卽在社稷壇勻
支

祝文

部頒

恭膺 詔命撫育羣黎仰體 彤廷保赤之誠勤農
勸稼俯維蔀屋資生之本力穡服田令甲爰頒肅舉
祈年之典寅衷將事用申守土之忱黍稷惟馨尙冀
明昭之受賜來牟率育庶俾豐裕於蓋藏

謹按會典神祇壇爲中祀

先農壇每歲仲春亥日祭紅牌金字填寫先農神牌於壇

承祭官率所屬俱於前期致齋一日祭日各官俱穿朝

服一切禮儀陳設供品悉照社稷壇之例行祭祀經費

在藉田穀價動支

惠州府屬共支銀五十五兩七錢八分歸善五兩九錢二分五釐博羅五

兩七錢二分二釐龍川五兩三錢一分五釐河源五兩四錢二分連平州五兩七錢三分八釐和平五兩六錢

二分永安四兩七錢海豐五兩七錢一分陸豐五兩九錢六分長甯五兩六錢八分

各省耕藉祭壇畢各官俱換蟒袍補服省城督撫秉

耒知縣執青箱知府播種府城知府秉耒佐貳執青

箱知縣播種州縣則正印官秉耒佐貳執青箱播種

行耕時用耆老一人牽牛農夫二人扶犁俱照九卿

之例九推九返農夫終畝耕畢各官率耆老農夫望

闕三跪九叩首農具俱用赤色牛用黑色箱用青色所

盛籽種照各處土宜各州縣藉田以四畝九分爲率
歲入穀數另列於後

祝文 部頒

維神肇興稼穡粒我烝民頌思文之德克配彼天
念率育之功常陳時夏茲當東作咸服先疇欽維

九五之尊歲舉三推之典恭膺守土敢忘勞民謹奉儀
章聿修祀事惟願五風十雨嘉祥恆沐於神床庶
幾九穗雙歧上瑞頻書於大有尙饗

謹按會典先農壇爲中祀

厲壇每歲清明日七月望日十月朔日祭無祀鬼神於本
城之北郊府州稱郡厲縣稱邑厲用羊三豕三飯米三

石香燭酒紙隨用祭時祭告城隍之神各州縣例支祭

祀經費銀十四兩八錢三釐在存留項下動支

惠州府屬共支

銀一百四十
八兩三分

告城隍文

部頒

欽奉

皇帝聖旨普天之下率土之上無不有人無不有鬼人鬼之道幽明雖殊其理則一今國家治民事神已有定例尚念冥冥之中無祀鬼神昔爲生民未知何故而沒其間有遭兵刃而橫傷者有死於水火盜賊者有被人強奪妻妾而忿死者有被人掠取財物而逼死者有誤遭刑罰而屈死者有天災流行而疫死者有

爲猛虎毒蟲所害者有饑寒交迫而死者有因戰鬪
而殞身者有因危急而自縊者有因墻屋傾頽而壓
死者有死後而無子孫者此等鬼神或終於前代或
沒於後世或兵戈擾攘流移於他鄉或人煙斷絕久
缺其祭祀姓名泯沒於一時祀典無聞而不載此等
孤魂死無所依精魂未散結爲陰靈或倚草附木或
爲妖作祟悲號於明月之下呻吟於風雨之中凡遇
人間令節魂杳杳以無歸意懸懸而望祭興言及此
憐其慘悽故敕天下有司依期致祭命本處城隍以
主此祭鎮按壇塲監察諸神等類其中有爲良善誤
遭刑禍死於無辜者神當達於所司使之還生中國

永享太平之福如有素爲克頑身逃刑憲雖獲善終亦出僥倖者神當達之所司屏諸四夷善惡昭報神必無私除欽奉外合就牒移城隍獄神弔出獄幽以享祭典久遠遵行

謹按會典厲壇爲羣祀

文廟每歲二八月上丁日致祭前期二日至犧牲所省牲承祭分獻各官致齋二日用白紙糊版墨書祝文送至

文廟神庫黃案上安設一跪三叩頭退前一日承祭官具朝服上香監視宰牲并瘞毛血正祭日分獻陪祀各官入兩旁門序立贊引官導承祭官至盥洗處盥手

畢引至台階下立典儀唱樂舞生就位執事官各司其事分獻官陪祀官各就位贊引官贊就位承祭官就拜位立分獻官隨後立典儀唱迎神唱舉迎神樂奏咸平之章樂作贊引官贊跪叩興承祭官陪祀官分獻官俱行三跪九叩頭禮興樂止典儀唱奠帛行初獻禮唱舉初獻樂奏寧平之章樂作贊引官贊陞壇導承祭官由東階上進殿左門贊引官贊詣

至聖先師孔子位前承祭官至案前立贊引官贊跪叩興承祭官行一跪一叩頭禮興贊引官贊奠帛捧帛官捧帛跪進承祭官受帛拱舉立獻畢贊引官贊獻爵執爵官捧爵跪進承祭官受爵拱舉立獻畢行一跪

一叩頭禮興

贊

引官贊詣讀祝位承祭官詣讀祝

位立讀祝官至祝案前一跪三叩頭捧祝版立於案

左樂止贊引官贊跪承祭官讀祝官分獻官陪祀官

各官俱跪贊引官贊讀祝讀祝官讀畢捧祝版至

正位前案上跪安帛匣內三叩頭退樂作贊引官贊叩興

承祭官及各官行三叩頭禮興贊引官贊詣

復聖顏子位前承祭官就案前立贊引官贊跪叩興承

祭官一跪一叩頭興贊引官贊奠帛捧帛官跪進於

案左承祭官受帛拱舉立獻案上贊引官贊獻爵執

爵官跪進於案左承祭官受爵拱舉立獻案上行一

跪一叩頭禮興

贊

宗聖曾子位前

述聖子思子位前

亞聖孟子位前獻爵獻帛如前儀其

十二哲分獻官陞壇奠帛獻爵俱照承祭官行禮兩廡
分獻官亦照承祭官行禮畢贊引官贊復位承祭官
分獻官各復位立樂止典儀唱行亞獻禮唱舉亞獻
樂奏安平之章樂作贊引官贊陞

壇獻爵於左如初獻儀贊引官贊復位承祭官分獻官各
復位立樂止典儀唱行終獻禮唱舉終獻樂奏景平
之章樂作贊引官贊陞

壇獻爵於右如亞獻儀贊引官贊復位承祭官分獻官各

復位立樂止典儀唱飲福受胙贊引官贊詣受福胙位承祭官至殿內立捧酒胙官二員捧酒胙至

正案前拱舉至飲福胙位右旁跪接福胙官二員在左旁跪贊引官贊跪承祭官跪贊飲福酒承祭官受爵拱舉授接爵官贊受胙承祭官受胙拱舉授接胙官贊引官贊叩興承祭官三叩頭興贊復位承祭官復位立次行謝福胙禮贊引官贊跪叩興承祭官分獻官及陪祀各官俱行三跪九叩頭禮興典儀唱徹饌唱舉徹饌樂奏咸平之章樂作徹訖樂止典儀唱送

神樂奏咸平之章樂作贊引官贊跪叩興承祭分獻陪祀各官皆行三跪九叩頭禮興樂止典儀唱捧祝帛饌

各恭詣燎位捧祝官捧帛官至各位前一跪三叩頭
捧起祝文在前帛次之捧饌官跪不叩頭捧起在後
俱送至燎位承祭官退至西旁立候祝帛饌過仍復
位立典儀唱望燎唱舉望燎樂咸平後闕樂作贊引官贊
詣望燎位導承祭官至燎位立祝帛焚訖贊禮官贊禮畢退

祝文 部頒

惟

先師德隆千聖道冠百王揭日月以常行自生民所未有
屬文教昌明之會正禮和樂節之時辟雍鐘鼓咸恪
薦於馨香泮水膠庠益致嚴於籩豆茲當仲春秋祇率
煊章肅展微忱聿修祀典以

復聖顏子

宗聖曾子

述聖子思子

亞聖孟子配尚饗

樂章

迎神樂奏咸平之章 無舞

大哉

至聖道德尊崇維持王化斯民是宗典祀有常精純並
神其來格於昭聖容

初獻樂奏寧平之章 有舞

自生民來誰底其盛惟師神明度越前聖綵帛具成

禮容斯稱黍稷非馨惟神之聽

亞獻樂奏安平之章 有舞

大哉

聖師實天生德作樂以崇時祀無斃清酤惟馨嘉牲孔碩薦羞神明庶幾昭格

三獻樂奏昇平之章 有舞

百王宗師生民物軌瞻之洋洋神其甯止酌彼金罍惟清且旨登獻惟三於嘻成禮

徹獻樂奏咸平之章 無舞

犧象在前豆籩在列以享以薦旣芳旣潔禮成樂備人神和悅祭則受福率遵無越

送神樂奏咸平之章 望燎同

有嚴學宮四方來崇恪恭祀事威儀雝雝歆茲惟馨
神馭還復明禋斯畢咸膺百福

新樂章

乾隆八年部頒

迎神樂

咸平之章

無舞

大哉

孔子先覺先知與天地參萬世之師祥徵麟紱韻答金
絲日月既揭乾坤清夷

初獻樂

寧平之章

有舞

予懷明德玉振金聲生民未有展也大成俎豆千古
春秋上丁清酒既載其香始升